



AU LEOLEO

2018



Ia Tatou Tatalo

EKALEZIA FAAPOTOPOTOGA KERISIANO SAMOA

UPU TOMUA

O Paia ma mamalu sauo'o o le Ekalesia, ua uma ona tosi lauti ona mamanu fa'atiti o tausala o le a ta'oto, aua ele gafataulimaina e se leo fa'atauva'a o le auauna.

Ae avea ia lenei avanoa e fai ai a'u ma sui o lenei Komiti, matou te fa'atalofa atu ai, a'o tatou aga atu i feau ma galuega amata o lenei tausaga. Fa'amalo le galulue! Fa'afetai le tatalo!

O le tatou tusi "**IA TATOU TATALO**", sa saunia le vaega muamua Ianuari seia o'o ia Iuni, e le Susuga i le Fa'afeagaiga o Fuatai Simanu, mai le Matagaluega Falealili Safata ma Siumu. A'o Iulai seia o'o ia Tesema, sa saunia e le Susuga i le Fa'afeagaiga o Afa Talaga, mai le Matagaluega Niusila I Saute.

E momoli ai le agaga fa'afetai tele, i Susuga i Fa'afeagaiga sa feagai ma lenei galuega tele.

Ia fa'amanuia le Atua le Leoleo Sili i le soifua tatalo o le Ekalesia Aoao, ma ia tumau pea lana ta'ita'iga i le tatou faigamalaga, e mautinoa lo tatou manuia ai.

Fa'afetai tele.

Sileli Taua'ifaiga FS.

EFKS Fagamalo

Matagaluega Itu o Tane

Sui Peresetene

Komiti Au Leoleo.

Ianuari 07 - 13, 2018.

Tusi Faitau: Salamo 121: 1-8.

Manatu Autu: E ta'ita'i ma leoleo le Atua i le Faigamalaga.

Faafetai:

Ona o le ta'ita'iga ma le leoleoga a le Atua mai lena tausaga, lenei ua taunuu ai i le amataga o le tausaga fou le tatou faigamalaga, i le manuia ma le filemu.

Ona ua fa'amafanafanaina ma fa'atalitonuina o tatou loto, i le ta'ita'iga o le Agaga Paia, e ui ina sa fesouaina le faigamalaga, i faigata ma le tele o fa'afitauli.

Ona o le alofa tunoa tele o le Atua, ua fa'ataunu'uina ai o tatou mana'oga ma le manuia.

Faatoesega:

Ona o le le 'ato'atoa o lo tatou fa'alagolago ma fa'atuatua, i a'ao alofa o le Atua le Ta'ita'i malaga.

Ona o le faigofie ona avaga o tatou loto ia Satani, ua le 'ato'atoa ai ona fa'atino lo tatou vala'auina.

Ona ua tele lo tatou fa'avaivai ma ola fa'afifilemu, ua fa'atupu tele ai lo tatou manatu fa'apito, ma le le fia auauna atu.

Manaoga:

Ina ia avea le Atua ma Ta'ita'i ma Leoleo Sili, e fa'alagolago tasi i ai le folauga a le Ekalesia ma le atunu'u i lenei tausaga.

Ina ia a'oa'o mai le Agaga o le Atua, ina ia tuu uma atu le fa'atuatua o lana fanau, i le soifua i le tino, mafaufau ma le Agaga, faitalia le Atua ma leoleo.

Ina ia galulue ma fa'amalolosi, ma tepa taula'i ia Iesu Keriso, e mapu ai e o fa'anoanoa ma fa'avauvau, ma maua uma ai le filemu moni.

Ianuari 14 - 20, 2018.

Tusi Faitau: Salamo 133: 1 - 3.

Manatu Autu: Faamaopopo le Aiga ma lou auva'a.

Faafetai:

Ona o le ta'ita'iga alofa a le Atua, ua maopopo ai Aiga o nu'u ma Ekalesia, aua se manuia o tagata uma, ma le faigamalaga o lenei tausaga.

Ona o le fa'amaoni o le alofa o le Atua, ua maua ai e tagata uma le filemu ma le fealofani, ma le nofo lelei i totonu o Aiga, Nu'u ma Ekalesia.

Ona o le Talalelei ua tupu ai le soifua fetausia'i i matai ma au'aiga, o matua ma fanau, ma le va ma isi uso a tagata.

Faatoesega:

Ona ua le avea o tatou aiga e fa'afailele ai, le loto fefa'amagaloa'i o le tasi i le tasi, pe a sopo tuaoi fanau i matua, o le tuagane i le tuafafine, ma le uso i le uso.

Ona o aiga o le papa fa'avae mautu o nu'u ma malo, a ua malepelepe ma ta'ape'ape i le matapoto o le ti'apolo, ona o le tatou fa'atamala.

Ona o le malosi o le 'oa ma le tamaoaiga ua sosofa ai le vatapuia, ona ua naunau tele o tatou loto i mea a le lalolagi, a ua fa'agalo ai le alofa o le Atua.

Manaoga:

Ina ia a'oa'o mai pea le Agaga o le Atua i loto ma mafaufauga o matua ma fanau, o matai ma 'aua'iga, faapea ma ta'ita'i uma o le atunu'u ma Ekalesia, ina ia tumau le fiafia e tapua'i i ona luma, i le agaga ma le faamaoni.

Ina ia avea a'oa'oga o le finagalo Paia o le Atua, e fai ma ta'iala i le tatou faigamalaga, e mautinoa lo tatou tutu ma galulue faatasi ai.

Ina ia afio pea le Atua i o tatou Aiga, Nu'u ma Ekalesia, e manuia ai mea uma tatou te faia.

Ianuari 21-27, 2018.

Tusi Faitau: Ioane 6: 5-13.

Manatu Autu: Ia lava taoso le Malaga.

Faafetai:

Ona o le anoanoa'i o au fa'amanuiaga i meaalofo eseese, ua fa'atamaoigaina ai i matou, aua e ui ina itiiti ma le a'ua'u mea matou te ofoina atu, ae e te fa'a'atoatoaina ma fa'amanuia mai.

Ona o fua o le Agaga Paia, ua taosoina ai le folauga a lau Ekalesia ma lau fanau.

Ona o le faamaoni o lou alofa, e le faapito ai lau tufa ma lau faasoa mo i matou, aua e tutusa tagata uma i lau silafaga Paia.

Faatoesega:

Ona ua tatou musuā e saili ma galulue, pe a utiuti le tamaoiga tatou te maua, ina ua lutia i faigata ma mala fa'alenua o tatou olaga.

Ona ua tatou le fafaga ma fa'afeinu, i e matelaina.

Ona ua tatou manumanu ma le foa'i mo lana Ekalesia, e ui ina taumasuasua o tatou tamaoiga.

Manaoga:

Ina ia fa'atumuina e le Atua o tatou tagata ma le sa o le Ekalesia, i lona tamaoiga ma ana meaalofo, e tatau mo le tatou faigamalaga.

Ina ia mafuta mai pea le Agaga ia te i tatou, tatou te malolosi ai e taualo pea, seia o'o i le taulaga e tu'utaula ai.

Ina ia fa'aa'upegaina uma i matou i le alofa tunoa o lau Afio, e leai ai se tasi e pau ese atu i le fa'aosoosoga ma le agasala.

Ianuari 28 – Fepuari 03, 2018.

Tusi Faitau : Fa’ataoto 9: 6 – 12.

Manatu Autu: Mulimuli i tulaga a’ao o le Atua.

Faafetai:

Ona o le malamalama o ala o lau Afio ua e faasino mai, matou te savavali ma mulimuli atu ai.

Ona e mautinoa le fa’ataunu’uina uma ma le manuia o o matou fa’amoemoega, pe a faamaoni ona matou mulimuli ma usiusita’i i lau Afio.

Ona ana le seanoa lou malamalama, semanū matou te fesēa’i i le lalolagi pogisa.

Faatoesega:

Ona e te ta’ita’iina i matou i avanoa o fa’amanuiaga mo lo matou ola, a ua matou o ese ma mulimuli i tu’inanau ma ala o le ti’apolo.

Ona o le femoumoua’i o lo tatou ola fa’atuatua i le Atua, e faigofie ai ona manumalo i o tatou loto, le fa’amalieina o o tatou tu’inauga fa’ale-tagata.

Ona ua tatou le faalogo i le musumusuga a le Agaga Paia, a ua tatou fa’alagolago i lo tatou lava malosi ma le atamai.

Manaoga:

Ina ia a’oa’o mai pea lou finagalo Tama, ia tafa tasi ai o matou ala uma i lau Afio ma le fa’amaoni.

Ina ia fa’amanuia e lau Afio fanau ma latou taumafaiga, i le amataina o a’oa’oga o lenei tausaga, ia popoto ma atamamai, ma ia viia ai lou Suafa mamalu.

Ina ia fa’atuputeleina le fiafia o ou tagata, e savavali ma mulimuli i ou tulaga a’ao, e uli ma sao ai le malaga.

Fepuari 04 – 10, 2018.

Tusi Faitau: Ioane 6: 30 – 40

Manatu Autu: Naunau ma galala i Afioga a le Atua.

Faafetai:

Ona o le tele ma le faula'i o le alofa foa'i fua mai o le Atua mo i tatou, ua fa'amalieina ai o tatou manaoga i le tele o mea lelei, i lea aso ma lea aso.

Ona o Iesu Keriso le areto ma le punavai o le ola, ua fa'amalieina ai lo matou galala.

Ona o Iesu Keriso ua fai ma malosi lilo, e una'iina i tatou e galulue ma le faamaoni, i le fa'ataunu'uina o lo tatou vala'auina.

Faatoesega:

Ona ua fa'asilisili ia te i tatou, le fa'amalieina o lo tatou galala i le tino, i lo'o lo tatou faia lea ma le faamaoni o le finagalo Paia o le Atua, tatou te manuia ai.

Ona ua tatou naunau e fa'aoga lo tatou malosi ma tomai ma agava'a, e saili ai o tatou mamalu ma ta'uleleia, i loo le viiga o le Atua le Tama.

Ona ua tatou te'ena pea Afioga Paia a le Atua, o sulu i o tatou vae ma le malamalama i o tatou ala.

Manaoga:

Ina ia liligi tele mai lona tamaoiga i la le Agaga, e malilie ai lo tatou matelaina.

Ina ia avea pea Afioga a le Atua, e fai ma sulu e fa'amalamalamaina ai o tatou ala uma, i lenei lalolagi le tumau.

Ina ia faatumauina le maua'a ma le mausali o lo tatou fa'atuatua i le Alii le Atua, ona o le fa'aolataga na Ia saunia e ala ia Iesu Keriso, lona Alo pele ma lo tatou Alii Fa'aola, ua tatou saofaga uma ai i lona Malo e fa'avavau.

Fepuari 11 – 17, 2018.

Tusi Faitau: II Timoteo 2: 1 – 5.

Manatu Autu: O le faatuatua i totonu o puapuaga ogaoga, e faigata ona faaumatia.

Faafetai:

Ona o olaga o ta'ita'i lelei ma le au faatuatua, sa latou mua'i talia le tala ia Iesu, ma asaina faigata ma puapuaga o le avea ma fitafita tau mo Keriso.

Ona o lea ua fai ma taiala mo olaga o tupulaga ma fanau lalovaoa, aua se lumana'i lelei ma le manuia, mo aiga, nu'u le malo ma le atunu'u.

Ona o meaalofa a le Agaga, ua fa'aauppegaina ai le au faigaluega, ma le au tau talavou mo Iesu Keriso.

Faatoesega:

Ona ua to'ilalo ma fa'alumaina tupulaga ma fanau, ona o tu'inaanau ma sauaga mataga e afua mai i ta'ita'i, ma le au matutua i totonu o aiga, totonu o galuega, ae faapea foi i totonu o faiganu'u ma totonu o Ekalesia.

Ona ua tatou le alolofa moni e pei ona alofa mai Keriso i lana Ekalesia, ua afua ai le fa'asalalauina solo o le lafu mamoe.

Ona ua faigofie ona maileiina tupulaga ma fanau e le ti'apolo, ona ua tatou fefefe e fa'atonu ua latou fa'atamala ai.

Manaoga:

Ina ia to'ia i tatou uma i le malosia o le mana o le Atua, tatou te loto tetele ai e tete'e atu i faigata ma fa'afitauli, e fetaia'i ma lo tou soifua ma so matou ola.

Ina ia fa'apupula mai o tatou mata faa-le-fa'atuatua, tatou te iloa moni ai ona matatau ma talitonu faamaoni, i le Atua ma lona alofa tunoa.

Ina ia faatonu ma ta'ita'iina e le Agaga Paia a tatou fanau i ala o le manuia, ma leoleoina o latou loto i aso uma e le aunoa.

Fepuari 18 – 24, 2018.

Tusi Faitau: Isaia 57: 14 – 16

Manatu Autu: E mau le Atua i loto ua fa'amomoina.

Faafetai:

Ona o lou mamalu ma lou Paia e silisili ese lava lea, ae e te faafogaina ma sisila alofa mai i ou tagata vaivai, ma le toilalo gofie i tu'inanau o le agasala.

Ona ua e le tu'ulafoa'iina i matou e tusa ma lo matou amioleaga, a ua e Afio mai lava ma ofoina mai lou soifua mama ma le le pona mo lo matou faaolaina, ona o le faamaoni o lou alofa.

Ona e te fusifusia ma togafitia o matou loto ma agaga fa'amanu'alia, ma fafaga ma fa'afo'isia i matou uma i le fa'amoemoe o le ola fou, ua uma ona e tapena mo lau fanau.

Faatoesega:

Ona o lo tatou fouvale pea i le Atua ma fa'ama'a'aina o tatou loto, ua tatou le lagonaina ai le faatasi mai o le Agaga Paia.

Ona e gaua'i pea o tatou loto i ala ma tonu a le ti'apolo, ua tatou le iloa ai ona salamo ma valaaulia le Atua, e afio tumau ai.

Ona ua le maua se nofoaga o Iesu Toetu i totonu ia i tatou, ina ua faatumu e le ti'apolo o tatou loto, i le suamalie ma le matalasi o lenei olaga le tumau.

Manaoga:

Ina ia fa'aali mai le malamalama o le Atua, e fa'apupulaina ai o tatou mata faa-le-agaga, tatou te mautinoa ai, e le'o se tatou amiotonu po'o ni a tatou galuega, e fa'aolaina ai i tatou, ae o le loto ua salamo ma fa'amomoina, ma faatuatua ma le faamaoni.

Ina ia aveeseina ia i tatou le loto ma'a'a ma le faamaualuga, o le faatauemu ma le mitamitavale, o le manatu faapito tu'inanau ma le mana'o lasi, ua tatou taumamao ai ma le Atua.

Ina ia fai o tatou tagata ma o tatou loto, ma Afioaga e afio tumau ai ma nofo tupu ai lo tatou Alii Fa'aola, O Le na matuā saili mai lava ina ia le fano se tasi, a ia maua e i tatou uma le ola e fa'avavau.

Fepuari 25 – Mati 03, 2018.

Tusi Faitau : Iosua 1: 6 – 9

Manatu Autu : A’oaiga ina ia faaeaina.

Faafetai:

Ona o le malosi o le mana o le Agaga Paia o lo’o tatou malolosi ai, ma fa’atonutonu folau i tatou i le faatinoga o le tatou tautua ma le auaunaga, mo le Atua ma lona finagalo paia.

Ona o matou ta’ita’i i aiga nu’u ma Ekalesia, faapea le malo ma le atunu’u, ua fai i latou ma ta’iala o le filemu, ma ala mai ai mo tagata uma le faaeaina, i faamanuiaga a le Atua.

Ona o le alofa taumulimuli o le Atua, o lo’o a’oa’oina ai pea i tatou ina ia tumau i le faatuatua, ona matala mai ai lea o faitoto’a o fa’amanuiaga, e le gata i le taimi nei, ae mo a taeao ma le lumana’i.

Faatoesega:

Ona ua fetosoa’i solo o tatou tagata e le faavaivai ma le le mautonu, ona ua tausolomua ia te i tatou o ta’ita’i, ona fa’aaoga le malosi o le pule amioletonu, e faamalieina ai lo tatou galala i le agasala ma ona tu’inanauga.

Ona ua faatasina le suafa mamalu o le Ekalesia Paia a le Atua, ona o a tatou faaiuga ua faia faale-tagata.

Ona ua tatou faamuamua o tatou tagata ae faamulimuli le Alii, ua tutuli ai o tatou taliga e faalogo i lona a’oa’o mai.

Manaoga:

Ina ia manino lelei pea i le silasila ma le vaai a o tatou tagata, aemaise lava i o tatou ta’ita’i i poloaiga ma tulafono a le Atua, e manuia ai o tatou tagata ma mea uma tatou te faia.

Ina ia aua lava ne’i galo, oi tatou ua na’o ni mea faigaluega ma ni auauna faatauva i luma o le Atua, a ia tuuina atu le viiga ia te Ia, i aso uma e le aunoa.

Ina ia tatou galulue pea ma le onosa’i ma le faapalepale, ma fusia i tatou uma i le alofa moni faale-Atua, e faatino ai le tatou tautua ma le auaunaga.

Mati 04 – 10, 2018.

Tusi Faitau: **Iakopo 1: 19 – 21.**

Manatu Autu: **Nofo i lalo ma fa'alologo i le Atua.**

Faafetai:

Ona o lona alofa lavea'i, ua malutia ma tausia ai pea i tatou.

Ona o le leo filemu e ala mai i le musumusuga a le Agaga Paia, e faate'a ese ai lo tatou loto ita ma le fia taui ma sui.

Ona o Afioga Paia a le Atua, ua tima'i ma fautuaina ai pea i tatou e fa'alologo ia te Ia, i itu aso o le sousou ma le lukaluka o le faigamalaga.

Faatoesega:

Ona ua avea le ita ma a'upega a le ti'apolo, e fa'aleagaina ai lo tatou lelei.

Ona o le le amanaiaina o le musumusuga a le Agaga Paia, tatou te onosa'i ai ma nofo i lalo, ma toe mafaufau ai aua e le po pea se nu'u.

Ona ua pulea o tatou loto e le fa'amauialuga ma le fia sili, ua faigata ai ona tatou faalologo i le Atua.

Manaoga:

Ina ia aveese uma e le Alii lo tatou Atua, mea uma o lo'o fa'avaivai ai e le ti'apolo o tatou loto.

Ina ia aveese ma faatau mamao ma o tatou loto, le manatu faapito loto ita ma le fia taui ma sui.

Ina ia faamanuia ma lotolotoi ai le Agaga o le Atua, i fonotaga uma a Komiti eseese i lenei masina.

Mati 11 – 17, 2018.

Tusi Faitau : **II Koronito 8: 1 – 7.**

Manatu Autu: **O le foa'i, o le taulaga.**

Faafetai:

Ona o le Atua lava na muai faia le fa'ata'ita'iga sili o le ola foa'i, e ala ia Iesu Keriso lona Alo pele e to'atasi, o le taulaga e tasi ae afe.

Ona o le taua i luma o le Atua, o le ola mo isi tagata.

Ona o le anoanoa'i ma le felanulanua'i o ana meaalofa, o lo'o faasoasoa mai e le Atua mo i tatou, i lea aso ma lea aso.

Faatoesega:

Ona o lo tatou lima mau ma le le ola foa'i mo isi, e o'o a ise ipu vai, aemaise foi le galuega a le Atua.

Ona o lo tatou fiafia e talia, ae mumusu e foa'i.

Ona tatou te faameo manuia o le Atua, ona o le manatu faapito.

Manaoga:

Ina ia a'oa'o ma faamanino mai pea e le Agaga mo i tatou uma, o le ola foa'i, o le ola fai taulaga lava lea i le Atua Soifua.

Ina ia tatou talitonu uma pea i le manuia o le tagata foa'i, nai lo'o le na te talia.

Ina ia faapaia ma faamanuia pea le Atua i so'o se ala o le foa'i, ma faiga taulaga uma a le Ekalesia.

Mati 18 – 24, 2018.**Tusi Faitau: Mika 4: 6 – 13.****Manatu Autu: O le Atua o le amataga fou.****Faafetai:**

Ona o lana faamasinoga amiotonu, ua tatou iloa ai lo tatou natura agasala.

Ona o lona tuu avanoa mai pea e toe timata ai le upega, ma tatou savavali uma ai i ala fua ua faasino mai.

Ona e ui ina tatou to'ilalo popo pea i le agasala, ae e i ai pea lona finagalo alofa, e mafai ai ona toe faafouina o tatou tagata.

Faatoesega:

Ona e tiga ona tatou iloa le sese, ae fesiligia pea lana faamasinoga tonu.

Ona o lo tatou tu'ua'i solo o le leaga, ae tatou lalafi ia tatou upu.

Ona se'iloga tatou te puapuagatia, ona lagona lea o le salamo, ae a sologa lelei, ona tatou faagalo lea o le Atua ae fai pea le agasala.

Manaoga:

Ina ia aveeseina uma ma i tatou e le Agaga o le Atua, le lagona o le fiafia e ola i le agasala, a ia totogo mai malama i lo tou soifua ma so matou ola, o se amataga fou ia Iesu Keriso.

Ina ia aua nei mate le faamoemoe o so'o se tagata ua salamo, ae tepa taula'i i le satauro o le manumalo, e fai ma faaola totoga o le ola fou.

Ina ia faamanuia le Atua i le au faigaluega ma auaiga, faapea le paia ma le mamalu o le Ekalesia aoao.

Mati 25 – 31, 2018.

Tusi Faitau: **Isaia 53: 1 – 7.**

Manatu Autu: **O le alofa, e tupuga mai totonu o puapuaga.**

Faafetai:

Ona o le alofa fua, na lagaina ai e le Atua lo tatou to'ilalo popo i le agasala.

Ona o le faailoga tagata o le Atua, ma le ala na Ia saunia ai lana faaolataga mo i tatou.

Ona o le alofa lavea'i o le Atua, na ofoina atoa mai ai Iesu Keriso lona Alo pele e to'atasi, o le Mesia puapuagatia, ua atoatoa ai le faaolataga mo i tatou.

Faatoesega:

Ona ua faaseseina i tatou i le matua ole Talalelei i Samoa, ae matua pepe meamea i le ola faatuatua.

Ona o lo tatou te'ena pea o le alofa lavea'i o le Atua, i aso uma o lo tatou ola.

Ona o lo tatou manatu mama i le faaolataga na tapena e le Atua, e ala i lona Alo pele ma lo tatou Alii Faaola.

Manaoga:

Ina ia tatou fa'aa'oa'o uma ia Iesu, le le ola faavaivai a'o molimau i le Upu Moni.

Ina ia totoa i tatou uma o lana aufaigaluega, a'o tatou tala'i ma faailoa atu lona finagalo paia.

Ina ia tumau pea i le Atua le viiga e o'o i le faavavau, ona o lona alofa lavea'i ia i tatou le fanau agasala.

Aperila 01 – 07, 2018.**Tusi Faitau: Ioane 20: 24 – 31.****Manatu Autu: Iesu e aumaia le ola.****Faafetai :**

Ona o le Atua ua tatou faatuatua i ai, o le Atua e soifua ma e soifua lava pea, e o'o i le faavavau.

Ona o le Atua o le puna ma le pogai o le ola, o lo'o tatou ola ma malolosi ai, e o'o lava i mea uma o le foafoaga.

Ona e ui lava ina faafoliga ma fa'ata'eta'ealuga lo tatou faatuatua i le Atua, ae saili mai pea lava ma faailoa mai, ua na'o Ia lava tatou te maua ai le ola, ma maua atili ai lava.

Faatoesega :

Ona o lo tatou fiafia e taulagi oi tatou o le aufaigaluega a le Atua, o le au so'o ma le au uso kerisiano, ae a tatou fetaia'i loa ma fa'afitauli o lo tatou ola vala'auina, ona tatou faafitia loa lea o le Alii.

Ona seiloga o faailoga ma vavega, ona faato'a faamaoni lea o lo tatou iloa o Iesu.

Ona o le vaivai o le tatou molimau atu, o Iesu o le Keriso lava Ia, o le Alo o le Atua ma lo tatou Alii Fa'aola, e maua ai e tagata uma le ola e fa'avavau.

Manaoga :

Ina ia a'oa'oina pea i tatou uma e le mana o le Agaga Paia, o le tumau o le talitonu ma le faatuatua i le toetu ma le manumalo o Keriso, o le ola fou lea i le sa'olotoga mo tagata uma.

Ina ia fa'amalamalamaina i tatou uma, o le manumalo o Iesu i le oti ma le tu'ugamau, o le atoaga foi lea o le alofa tunoa o le Atua, ma i tatou uma o lana fanau.

Ina ia aveese ma o tatou mafaufau vaivai, le masalosalo ma le faalotolotolua, le fefe ma le atuatuvaale, ina ua manino i le tatou vaai faa-le-agaga e ala i lo tatou faatuatua, ua toilalo le fili ma le ti'apolo.

Aperila 08 – 14, 2018.

Tusi Faitau: II Nofoaiga Tupu 19 :1 – 9.

Manatu Autu: Ia saunia le lotu.

Faafetai :

I le Atuafoafoa, aua ua uma lava ona Ia saunia o tatou lotu, tatou te saili atu ai ia te Ia

Ma le faamaoni.

Ona o faataitaiiga lelei, o le ola ma savavali i le amiotonu ma le lotu maualalo, sa a’oa’oina ai i tatou e o tatou matua ma tua’a ua fai i lagi le folauga, e mautinoa lo tatou manuia ai ma a tatou fanau.

Ona o Iesu Keriso ma le faataitaiiga sili, o le lotu ua saunia ma ofoina atoa mo le Atua le Tama, e faataunu’uina ai lona finagalo paia.

Faatoesega :

Ona ua faatumauina o tatou lotu i tu’inanauga fia faamalieina, i le matalasi o le agasala ma le amioleaga, ua tatou te’ena ai pea le musumusuga a le Agaga.

Ona o le vaivai ma le lava o lo tatou ola faatuatua i le Atua, e mafua ai ona tatou to’ilalo pea, i fa’aosoosoga a Satani ma ana au.

Ona o le tauaso pea o o tatou mata faa-le-agaga, ona o le pupu o o tatou lotu i mamalu ma mauia faa-le-lalolagi, a ua ama ai le tatou vaai i fa’amanuiaga e tumau, e o’o lava i le faavavau.

Manaoga :

Ina ia tatou faataua le tapena ma saunia lelei o tatou lotu, e faaafio tumau ai lo tatou Alii.

Ina ia faafou ma faamama e le Atua o tatou lotu uma, ma foa’i mai le poto tatou te iloa ai mea lilo uma o lona malo, tatou te saili atu ai ia te Ia ma le faamanoni.

Ina ia aua ne’i o tatou faavaivai e a’oa’o ma faasino i tagata uma, le upu moni a le Atua ma lona finagalo paia, e saunia ai lotu uma mo lona toe afio mai.

Aperila 15 – 21, 2018.

Tusi Faitau: Mareko 8: 31 – 38

Manatu Autu: Auauna puapuagatia.

Faafetai :

Ona o le satauro o Keriso, ua avea lea ma ogatotonu o lo tatou ola i aso uma, aemaise le faatuatua ola i galuega, o tiute ma faiva ua valaauina i ai i tatou, i le Ekalesia ma le Talalelei.

Ona e ui ina alu uma lo tatou malosi, e saili ai le lalolagi ma ona tu'inauga ma fiafiaga, a'o lea ua faaali manino mai e le auauna puapuagatia, o mea uma na e le tumau ma e pala.

Ona o avanoa ua aumaia e Iesu tatou filifili ai, po'o le faasaogalemu po'o le faama'imau o lo tatou ola ona o Ia.

Faatoesega :

Ona ua tatou le fiafia e faia le finagalo o le Atua, ona o lo tatou tu'inanau e faamalie o tatou manaoga faa-le-tagata.

Ona ua avea lo tatou mulimuli ia Iesu, e saili ai o tatou manuia, ma faataunu'u ai o tatou tu'inauga.

Ona ua alu vale lo tatou malosi ma le tamaoaiga, i mea e leai se aoga, a ua le faama'imauina mo Iesu tatou te maua ai le ola, ma maua atili ai lava.

Manaoga :

Ina ia fa'alototeleina e le Agaga o le Atua o tatou tagata, ma foa'i mai le malosi, aua lo tatou feagai ai ma mafatiaga ma puapuaga, o le galuega a le Atua.

Ina ia una'iina pea i tatou e le mana o le Atua, tatou te faia ai mea sili mo Iesu, ma pule ai o Ia i lo tatou ola.

Ina ia tatou maua uma le malosi faa-le agaga, e ala i le faamaoni o lo tatou faatuatua, tatou te tumau ai ia Iesu Keriso lo tatou Faaola, i taimi o tiga ma faigata o lo tatou vala'auina.

Aperila 22 – 28, 2018.

Tuai Faitau Mika 3: 9 – 12.

Manatu Autu E tupu le fa'amoemoe i le taalogologo.

Faafetai :

Ona o Afioga Paia a le Atua, ua taalogologo ai pea lo tatou ola faa-le-faatuatua, ina ia maua'a ma mausali.

Ona o lo tatou Atua o le Atua o le amiotonu, ma fa'amoemoega lelei uma, mo lo tatou manuia ma o tatou fanau.

Ona o Iesu Keriso le Atua ua liu tino tagata, ma ua taunu'u ai ia te Ia le upu o le faaolataga.

Faatoesega :

Ona ua vaivai le tatou taalogologo i upu o le ola, ae malosi i upu o le matau'a ma le tau faa-valea.

Ona o le taumamao o lo tatou ola i aso uma, ma le faamaoni ma le amiotonu a le Atua.

Ona o le pule saua ma le mata pe'ape'a, ua tatou faapi'o ai le amiotonu a le Atua.

Manaoga :

Ina ia tatou talosia i latou uma ua sauaina, ona o le taalogologo o le upu moni, ma ta'utino le amiotonu a le Atua.

Ina ia fai ma fu'a tualuga i le fanau uma a tagata, faapea foi i tatou ma le atunu'u, o le manumalo o Iesu Keriso i le oti ma le tu'ugamau, o lo tatou foi lea manumalo, pe a tatou talia o Ia ma le faamaoni.

Ina ia faamanuia le Atua i le Kolisi Faa-Faifeau i Malua, ma ana galuega ma polokalame uma o lenei tausaga.

Aperila 29 – Me 05, 2018.

Tusi Faitau : I Peteru 1 : 3 – 9.

Manatu Autu: O lo tatou faamoemoe Ola.

Faafetai:

Ona o le faamoemoe ola o le Atua le Tamā, e ala i lona alofa tunoa mo i tatou le fanau agasala, na Ia auina mai ai lona Alo pele e fai ma o tatou togiola.

Ona o le faamoemoe o le Atua i lana Meaalofa Silisili ese, ua mautinoa ai le malutia o lo tatou ola, ma lo tatou tumau ai i ona aao alofa.

Ona ua avea le faamoemoe o le Atua, e faatupu atili ai lo tatou olioli ma fiafia, e ofoina atu mea uma ia i tatou e oo lava i lo tatou ola, e pule ai o Ia ma fai ai lona finagalo.

Faatoesega:

Ona o le faigofie ona aveesea e le tiapolo o tatou faamoemoe, pe a lutia i tatou i peauvale ma tofotofoga o le soifua tautua, ma le ola auauna.

Ona ua tausolomua i le Ekalesia ma ta'ita'i, le faavaivaia o le fanau a le Atua, e fia taumafai mo le faaolataga ma manuia atali e le pala.

Ona ua tatou le faalagolago ia Iesu, ma taula'i pea le tatou vaai i lona manumalo, tatou te malolosi ai pea e aga'i i luma ma le loto tetele ma le onosa'i.

Manaoga:

Ina ia foai mai i le Ekalesia ma o tatou tagata, le malosi lilo ma le faatuatua moni, e atina'e ai lana galuega ma lona aiga i le lalolagi.

Ina ia avea lo tatou faamoemoe ma faalagolago, i le malosi o lona mana paia, e faaumatia ai le tiapolo ma ana au, o loo taumafai pea e manumalo i lo tatou ola.

Ina ia avea pea lau Afio ma maluapapa o ō matou olaga, ma ia atina'e o matou ola i luga o Oe Iesu Keriso le faavae mausali, o lo matou faamoemoe ola.

Me 06 – 12, 2018

Tusi Faitau: **Mataio 11: 28 – 30.**

Manatu Autu: **O mai ia te A'u.**

Faafetai:

Ona ua faailoa uma mai lava e le Atua le Tama lona finagalo paia, i mea uma tatou te manuia ma saogalemu ai, e ala ia Iesu Keriso.

Ona ua valaauina o tatou tagata faatauva, mo lana galuega ma ana feau.

Ona o le Talalelei o le saolotoga moni, e mapu ma maloloina ai le tino ma le agaga, mai tiga ma mea mamafa uma o le olaga.

Faatoesega:

Ona ua avea lo tatou valaauina i le Talalelei, ma ala tatou te faamaualuga ai ma mitamitavale, ma tatou vaai maualalo ai i isi o tatou uso a tagata.

Ona ua fai foi lo tatou o ia Iesu ma avanoa, e saili ai o tatou mamalu ma manuia faaletagata, a ua tatou le saili moni le Atua ma lona malo, ma lana amiotonu.

Ona ua tatou faaogaina foi le suafa o Iesu Keriso, e fai ma mailei e faalauiloa ai le tatou pule, ma lo tatou fia atamamai.

Manaoga:

Ina ia fesoasoani mai le Agaga o le Atua mo i tatou ma le Ekalesia, ina ia faatumauina pea lo tatou faatuatua ia Iesu Keriso, le Pule ma le Ao o mea uma.

Ina ia tatou faia mea uma lava i lenei lalolagi le tumau, ma le moni o le alofa ma le ava i le Atua.

Ina ia tatou mautinoa uma pea, o lo tatou mulimuli atu ia Iesu Keriso, o lo tatou o e fai ma ona so'o, fai ma ana auauna, ma faailoa atu le Alii manumalo.

Me 13 – 19, 2018.

Tusi Faitau: **Luka 1: 39 – 45.**

Manatu Autu: **Avea le faatauvaa e manuia ai tagata uma.**

Faafetai:

Ona o Lou mafutaina ma Lou faaali mai i o matou tina, e ala i le tele o au meaalofa ala eseese, ua faamanuiaina ai fanau, o aiga nuu ma malo ma ekalesia.

Ona o avanoa ua saunia e lau Afio, e faalauteleina ai tomai ma agavaa o o matou tina, aua le faataunuaina o o latou faiva ma tiute.

Ona o galuega uma tatou te faia ma le faatuatua faamaoni ia Iesu Keriso, e le gata e atina'e a'e ai le tamaoaiga i le tino, o o tatou aiga nuu ma ekalesia faapea le malo ma le atunuu, ae atina'e a'e ai foi le soifua faaleagaga o o tatou tagata, ma tatou saofaga uma ai i le ola e faavavau.

Faatoesega:

Ona ua le atagia le alofa faatina o le Atua ia tatou amioga, ma le faatinoga o o tatou tofi ma tiute.

Ona ua naunau ma pupu o matou loto i mea matagofie o le lalolagi nei, ua galo ai o matou faiva, ma le matou tautua i lou finagalo ma lou malo.

Ona ua avea lo matou teena o lau Afio ma lou finagalo paia, ma mea ua afaina ai lagona ma mafaufau o isi uso a tagata, ma latou fulitua ai i lau ekalesia ma le talalelei.

Manaoga:

Ina ia avea uma o tatou tina e fai ma ave fu'a o le Talalelei, i le faataunuaina o o latou tofi ma tiute, aua se manuia o o tatou tagata ma le galuega a le Atua.

Ina ia foai le loto faatuatua i tina uma e galulue ai ma le faamaoni, ma faatuputeleina ai lo latou fiafia, e tetee atu i faaososoga ma tuinanau o lenei olaga.

Ina ia avea le tatalo e fai ma malosi lilo, e le gata i le soifua auauna o o tatou tina ae faapea foi ma i tatou uma, ona mautinoa lea o lo tatou manumalo i le tauiviga, o loo faia ma le fili i aso uma.

Me 20 – 26, 2018.**Tusi Faitau: Iakopo 2: 14 – 18.****Manatu Autu: O le faatuatua e ala i galuega.****Faafetai:**

Ona o le Atua lava ua Ia faaali manino mai, o le soifua faatuatua moni, e le na’o le taulagi o lo tatou iloa o le ala, upu moni ma le ola, ae o le faatinoina o galuega lelei uma, ina ia fua tele mai.

Ona o le fesoasoani mai o le Agaga o le Atua, ua maua ai e o tatou tagata faatauva le malosi ma le loto tele, tatou te galulue ai ma le faatuatua ma le faamaoni, e faatino lo tatou valaauina.

Ona o le onosai ma le faapalepale, ma le faamaoni o le alofa o le Atua mo i tatou, e ui lava ina tatou fulitua ma solipala lona finagalo paia, i le tele o taimi ma aso o lo tatou ola.

Faatoesega:

Ona ua tatou atamamai e laugaina ma folafola le faatuatua, ma tatou popoto e su’esu’e a’oa’oga ma mataupu silisili faakerisiano, a ua le mafai ona suia ai a tatou amioga ma olaga.

Ona o le femoumoua’i o lo tatou faatuatua i le Alii, e le gata i taimi e tele ai lo tatou tamaoaiga, ae faapea foi i taimi e utiuti ai le tatou faasoa.

Ona o le vave ona taou liliu i le faatuatua mate, pe a tatou le lavava ona galulue ma auauna atu, i galuega o le alofa, ma galuega o le faatuatua moni.

Manaoga:

Ina ia avea lo tatou faatuatua e faaalia ia tatou galuega fai, e fai ma ala e faaolaina ai agaga o tagata le talitonu ia Iesu Keriso, lo tatou Alii ma le Faaola.

Ina ia faatuputeleina pea, le soifua faatuatua o tagata uma ma ekalesia i le Atua, ona mautinoa lea o le tupu lauusi o le talalelei, i soo se tulimanu o le lalolagi.

Ina ia faaauegaina pea e le mana o le Atua, o tatou tagata ma le ekalesia ma o tatou taitai, e faafetaia’i ai faafitauli ma to’atuga o lo tatou valaauina, ona maualuga ai lea o le viiga o le Atua, i fua oa tatou feau ma galuega.

Me 27 – Iuni 02, 2018.**Tusi Faitau: Ieremia 29: 10 – 14.****Manatu Autu: O fuafuaga a le Atua.****Faafetai:**

Ona o fuafuaga alofa a le Atua, e auala mai i tua'a ma matua ua fai i lagi le folauga, ua tatou maua ai ma a tatou fanau le sa'olotoga, mai pulega a isi malo.

Ona o le talalelei ia Iesu Keriso, o le fuafuaga poto sa faatalitali i ai o tatou ta'ita'i, lea ua tatou nonofo ai i le filemu, ma fefaasoa'i i faamanuiaga.

Ona o le saolotoga moni na tapenaina i le soifua atoatoa o Iesu, o ai lava e talia ma le faamaoni, ma faatuatua i lona maliu ma lona toetu, e maua le faaolataga e faavavau.

Faatoesega:

Ona a fesoua'iina i tatou e peau vale o le ola nei, ona tatou faagalo lea o le Atua le taitai malaga sili, ma ana fuafuaga mo i tatou i totonu o puapuaga.

Ona ua tatou faamoemoe ma faalagolago, i le malosi atamai ma le tamaoaiga o isi malo o le lalolagi, a ua faatuatua'i le Atua moni e toatasi, ua faavae ai Samoa ma Ekalesia Kerisiano uma.

Ona ua tatou fiafia e faaoga ma saili o tatou lava manuia, i le malosi ma le afu sisina o isi o tatou uso a tagata, ua oo lava foi i le Ekalesia pele a Keriso.

Manaoga:

Ina ia faamanuia e le Atua Samoa, mai lava i ona taitai e oo i ona tagata nuu uma, o fea lava o le lalolagi o alala ma aumau ai.

Ina ia faatumauiina le saolotoga moni i le malo ma lona tutoatasi, ma faatumauiina foi le talalelei i loto ma agaga oo tatou tagata uma, tatou te faia ai pea mea sili mo le Atua, ma lona finagalo paia.

Ina ia leoleoina i tatou e aao lavea'i o le Atua, ma faataumamao ma le tatou faigamalaga ni mala ma ni puapuaga, a ia i luga oi tatou uma lona filemu ma lona manuia.

Iuni 3 – 9, 2018.

Tusi Faitau: Ioane 13: 12 – 20.

Manatu Autu: O le ala i le pule o le tautua.

Faafetai:

Ona o le valaauina o o tatou tagata e fai ma ana meafaigaluega i le lalolagi.

Ona o le faaaoao ua aumai e Iesu Keriso, tatou te mulimuli ma faata'ita'i i ai.

Ona o Iesu Keriso lava na taulamua i le olaga tautua.

Faatoesega:

Ona o lo tatou mananao e auauna mai, ae mumusu e auauna atu.

Ona o lo tatou tautua paō.

Ona ua le atagia le faamaoni o lo tatou Alii Faaola o Iesu Keriso, i lo tou soifua tautua ma so matou ola auauna.

Manaoga:

Ina ia tupu tele le fiafia o tagata uma o le atunuu ma le lalolagi, e tautua ma auauna ma le faamaoni, mo le Atua ma lona malo.

Tatou talosia galuega tetele a le Ekalesia faapea ana aoga, ina ia maua e tagata uma o lo'o tautua ma galulue ai, le alofa moni faa-Keriso e faatino ai o tatou tofi ma tiute.

Ina ia faamalosi au ma galue le Agaga o le Atua, i le galuega faa-misionare a le Ekalesia, e musaesae ai lana molimau i soo se tulimanu o le lalolagi.

Iuni 10 – 16, 2018.

Tusi Faitau: **Filipi 3: 17 – 21.**

Manatu Autu: **Fai i ala o le Atua.**

Faafetai:

Ona o le ola ma le malosi o loo tatou maua pea i aso uma.

Ona o faaitaiga lelei ua faasino mai e le Alii, e faatino ai o tatou tofi ma tiute.

Ona o lea lava ua manino lo tatou ala i malo, ina ua fetalai tuusa'o Iesu, o A'u nei le ala, upu moni ma le ola, e le alu atu lava se tasi i le Tama, pe a le ui mai ia te A'u.

Faatoesega:

Ona o le ese o mea ua tatou faia, ese ala ua uma ona faasino mai e Iesu Keriso, tatou te ola ma savavali ai.

Ona o lo tatou ola faafoliga ma femoumoua'i i luma o le Atua, ua fepiopioa'i ai pea o tatou ala.

Ona ua tatou lafoa'i ala o le Atua, ina ua tatou fiafia i ala o le tiapolo, ma le tamaoaiga tatou te maua mai ai.

Manaoga:

Ina ia tatou mulimuli pea i alafua ua faataoto mai e Iesu, tatou te taunuu ai i le manuia.

Ina ia lagona i o tatou loto uma, o ala o le satauro, o ala o le tautua ma le ola ofoina atu.

Ina ia maua e le lalolagi vevesi le to'afimalie ma le filemu.

Iuni 17 – 23, 2018.

Tusi Faitau: Kenese 3: 8 – 15.

Manatu Autu: O fea ea oe?

Faafetai:

Ona o le liligi faavai mai e le Atua o lona alofa tunoa, ua manuia ai pea lo tatou ola.

Ona o le faasafua mai pea mo i tatou i aso uma, o lona sosia ma lona tamaoaiga, e tausi ai lo tatou ola.

Ona e le tuulafoa'iina i tatou e le Atua, ae saili mai pea ina ia tatou maua uma le ola, ona o le faamaoni o lona alofa.

Faatoesega:

Ona o le le usitai o le tagata i le Atua, ua afua ai ona tatou ola toilalo.

Ona tatou te popoto e tautuu'a'i ma tusitusilima, ae valea e suesue ifo.

Ona o lo tatou fiafia e sosola ma lalafi i luma o le Atua, ae galo ia te i tatou, e silafia e le Atua mea uma.

Manaoga:

Ina ia faamanino mai e le Agaga Paia i o tatou loto uma, e le lilo lava se tasi i luma o le silafaga paia a le Atua.

Ina ia tausi ma pa'i atu le mana o le Atua i e uma o mama'i, faanoanoa ma puapuagatia.

Tatou tatalo mo i latou uma o loo faimalaga i luga o le sami, le laueleele ma le ea, ina ia faataunuaina ma le manuia e le Atua, o latou faamoemoega uma.

Iuni 24 – 30, 2018.

Tusi Faitau: Auega 1: 1 – 6.

Manatu Autu: E lutia i puava, ae mapu i Fagalele.

Faafetai:

Ona o talatu o tiga ma faigata o le ola nei, o loo i ai le mapusaga moni i aao alofa o le Atua.

Ona o le onosa'i ma le faapalepale o Iesu Keriso, ua ofoina atoa mai ai lona soifua paia, e fai ma o tatou togiola.

Ona o le suamalie o le manumalo, pe a mavae lu'itau o le ola nei.

Faatoesega:

Ona o lo tatou palaa'ai gofie i lu'itau o le ola galue.

Ona o lo tatou ola faatamala, ua lutia ai pea i tatou i faaososoga, ma tatou pa'u atu ai i le loloto o le agasala.

Ona o lo tatou faagalo o le Atua i ituaso sololelei, ae fesiligia lana amiotonu, pe a siisii le aupeau ma lualuta le gataifale.

Manaoga:

Ina ia manino pea le tatou vaai faaleagaga i le Atua, na te le tuulafoai'ina ai i tatou i taimi ma aso uma o lo tatou ola.

Ina ia lotolotoi pea ma taiala le Atua, i le tatou folauga ma le faigamalaga.

Ina ia faaoloaina pea e le Atua i tatou uma, i le malosi, loto tele, le atamai, faautauta, ma le faatuatua faamaoni, e faatino ai lo tatou valaauina.

Iulai 8 – 14, 2018.**Tusi Faitau: Ioane 4: 13 – 15.****Manatu Autu: O Iesu o le punavai e faamalieina ai le tagata.****Faafetai:**

Ona o lona manuia foai fua mai, ua faamalieina ai lo tatou galala i aso uma .

Ona o Ia lava o le punavai, e faamalieina ai le ola faaleagaga o tagata, ina ia saofaga uma ai i lona malo e faavavau.

Ona o le vaiola na tafe mai i le satauro, ua tatou manumalo ai faatasi ma Ia.

Faatoesega:

Ona ua tele ina tatou le amanaia le punavai e ola ai, a ua tatou saili i mea faatauva, tatou te le malilie ai.

Ona ua fai i tatou ma pa pupuni o le tafe atu o le vai ola, ina ia faaolaina ai isi o tatou uso a tagata.

Ona ua sili lo tatou fiafia, e feinu i vai e maua ai le malaia ma le faafanoga, i loo le vaiola o le alofa tunoa o le Atua, tatou te manuia uma ai ma a tatou fanau.

Manaoga:

Ina ia tafe mai le manuia o le Alii i lana Ekalesia aoao, aua le atinaeina o lana galuega ma lona malo e faavavau.

Ina ia faatumulia pea i tatou uma i le vaipuna o le ola, e faatino ai o tatou tofi ma tiute.

Ina ia puna pea le vaiola i o tatou loto ma agaga, ma faaosofia ai i tatou uma, e ofoina atu mea uma ua ia i tatou e oo lava i le ola, mo le Atua ma lona finagalo paia.

Iulai 15 – 21, 2018.

Tusi Faitau: Roma 8: 1 – 5.

Manatu Autu: O tagata o le Atua.

Faafetai:

Ona o le faamaoni o le alofa tunoa o le Atua, ua laveaiina mai ai i tatou i le malaia ona o le agasala.

Ona o le avanoa ua aumaia e le Alii, e avea ai i tatou ma itu tino o lana galuega, aua o Ia lava o le Ao o le ekalesia, ma le auala i le faaolataga.

O o lona alofa tunoa ua ala mai ai lo tatou fesoasoani sili, o le Agaga Paia lea.

Faatoesega:

Ona ua le avea i tatou e fai ma tagata e fesoasoani io tatou uso a tagata, ona o tuinanauga o le agasala.

Ona ua avea fiafiaga ma mea faatosina a le lalolagi, ua tatou mumusu ai e ofoina atoatoa lo tatou ola, mo le Alii ma lana galuega.

Ona ua tatou naunau e saili o tatou viiga faaletagata, i loo le viiga o le Atua.

Manaoga:

Ina ia avea i tatou ma tagata faamaoni o le talalelei i aso uma, ma susulu atu ai le malamalama o Keriso, io tatou aiga nuu ma ekalesia.

Ina ia atagia pea i le faatinoga o o tatou tofi ma tiute i aso uma, le alofa ma le faamaoni.

Ina ia aua lava nei galo ia te i tatou uma, o le Atua o le puna o faamanuiaga uma, tatou te manuia ai i la le tino, atoa foi ma la le agaga.

Iulai 22 – 28, 2018.

Tusi Faitau: **Mareko 6: 53 -56.**

Manatu Autu: **O Keriso le fomai sili.**

Faafetai:

Ona o Iesu Keriso o le fomai sili lea mo tagata uma, aua nate faamaloloina o tatou tino, mafaufau ma agaga.

Ona ua faaali manino mai e Iesu mo i tatou, le silisiliese o le malosi o le mana o le Atua, tatou te manumalo ai i le Alii o le lalolagi.

Ona ua na’o Iesu Keriso lava le vailaau ma le fofo, tatou te mapu ma malolo moni ai.

Faatoesega:

Ona ua tatou saili solo se fomai mo tatou faaletonu ma faafitauli, a ua tatou le saili ia Iesu le fomai sili, e mautinoa lo tatou manuia ai.

Ona ua tatou mama’i faaleagaga, ina ua tatou faagalo le Fomai Sili, o loo faatalitali mai mo i tatou.

Ona ua mua ona pupu o tatou loto i tu ma aga faapaupau, a ua le faamuamua le Alii tatou te ola ai.

Manaoga:

Ina ia tatou manatua uma pea le Fomai Sili na auina mai, e saili ma faaola i e ua leiloa.

Ina ia manino pea i le tatou vaai faaleagaga, ua na’o Iesu Keriso lava le fomai sili, e tataua ona tatou saili fesoasoani i ai.

Ina ia maua’a ma mausali pea le faamaoni o lo tatou ola faatuatua i le Alii, aua ua na’o Ia tatou te maua ai le filemu ma le mapusaga moni.

Iulai 29 – Aokuso 4, 2018.

Tusi Faitau: Ioane 3: 16 – 18.

Manatu Autu: Faailoa atu le alofa faale-Atua.

Faafetai:

Ona o le alofa faamaoni o le Atua e felanulanua'i, e lautele ma loloto, e leai foi sona gataaga. Ona e tutusa tatou uma i le silafaga paia a le Atua, aua e le faapito pe faailoga tagata lona alofa. Ona o manuia tatou te maua mai i le alofa o le Atua, e tumau lava lea io tatou luga e oo i le faavavau, pe a tatou faamaoni ma usiusitai i lona finagalo paia.

Faatoesega:

Ona ua tatou manatu mama ma talitua limaina le alofa o le Atua, ua tatou le faamaoni ai i le faatinoga oo tatou tofi ma tiute.

Ona o le mana'o lasi oo tatou loto, ua faapito faaletagata ai le alofa, ua faatino ai lo tatou valaauina.

Ona ua tatou manatu e maua fua faamanuiaga a le Atua e ala i lona alofa, e aunoa ma lo tatou faia o lona finagalo paia.

Manaoga:

Ina ia fusia i tatou uma i le alofa moni faale-Atua, tatou te galulue faatasi ai mo se manuia o tagata uma, ma le viiga o le Atua.

Ina ia tupu lauolaola ma lauusi, le alofa moni faale-Atua i o tatou loto ma agaga, e faatino ai lo tatou valaauina, ona manuia ai lea o mea uma tatou te faia.

Ina ia avea i tatou uma e fai ma moli, e susulu atu ai le alofa moni faale-Atua, i tagata uma o loo mafatia ma tigaiga, ma fia maua se lavea'i.

Aokuso 5 – 11, 2018.

Tusi Faitau: Eperu 13:12 – 16.

Manatu Autu: O taulaga e faia i le Atua.

Faafetai:

Ona o le faataitaiga lelei ua faia e Iesu Keriso i lona soifua, o le taulaga sili lea e lima taita'iina ai i tatou, i mea e ao ona tatou faia.

Ona o le ala ua faasino manino mai e lo tatou Alii, e mu ai ma manogi lelei a tatou taulaga i luma o le Atua le Tama, o le ofoina atu lea o mea uma ua ia i tatou e oo lava i lo tatou ola.

Ona o lana talalelei ua fai ma faamalosiā, tatou te faatino ai galuega lelei, e tosina mai ai tagata uma i manuia o le Atua ma lana faaolataga.

Faatoesega:

Ona ua matele i le faaletino ma le faaletagata le faiga o a tatou taulaga, e ala i lo tou soifua tautua ma so matou ola auauna.

Ona ua fai ma a tatou vaisu le taofi o mea lelei ma atoatoa mo i tatou, ae tatou fai taulaga i le Atua i mea ua faaletonu ma le atoatoa.

Ona ua galo ia te i tatou, o le faamaoni o le faatinoina oo tatou tofi ma tiute ma lo tatou valaauina, o taulaga sili ia e fia silasila mai i ai le Alii.

Manaoga:

Ina ia faatauaina e o tatou tagata i taimi uma, le taulaga na saunia e le Atua, ma fai ma pine faamau i lo tatou ola auauna.

Ina ia tuuina ma ofoina atu mea uma ua ia i tatou e oo lava i lo tatou ola, tatou te galulue ai mo se manuia o le ekalesia ma tagata uma, ma le viiga o le Atua.

Ina ia avea lo tou soifua ma so matou ola e fai ma taulaga, e faaolaina ai isi o tatou uso a tagata, ma maua ai ni agaga se tele mo le Atua ma lona malo.

Aokuso 12 – 18, 2018.**Tusi Faitau: Salamo 51: 10 – 12.****Manatu Autu: Ia tautua ma le loto mama****Faafetai:**

Ona o le alofa faamaoni o le Atua, o loo tuu avanoa mai ai pea mo i tatou le tagata agasala.

Ona o le faaaogaina oo tatou tagata faatauvaa, e fai ma vaa ma ipu o le faaolataga, e ala I tofi ma tiute ua aumai e le Atua, tatou te auauna atu ai.

Ona ua faamanino ma faapupula mai e le Alii mo i tatou uma, a aunoa ma le loto mama e faatino ai lo tatou valaauina, e le mafai ona tatou taitai mai tagata o loo i le pogisa, i lona malamalama.

Faatoesega:

Ona ua tatou fiafia e opogi le loto leaga, loto faamaualuga ma le loto fia tau ma sui, e faataunuu ai o tatou feau ma galuega, ua le atagia ai le malamalama ma le mama atoatoa o le Alii ia tatou amioga.

Ona o le vaivai ma le femoumoua'i o lo tatou ola faatuatua i le Atua, ua tatou tumau ai pea i le pogisa o le agasala ma le amioleaga.

Ona o le faamuamua o le sailia oo tatou mamalu ma manuia faaletagata, e le mafai ai ona mama o tatou loto, e faatino ai le tatou tautua mo le Atua ma lona finagalo.

Manaoga:

Ina ia faatumuina e le Atua i le loto mama, tagata uma o aiga nuu ma ekalesia, tatou te tau fai galulue uma ai e fai mea sili, mo le manuia o tagata uma ma le viiga o le Atua.

Ina ia tutu ma galulue faatasi tagata uma o le ekalesia, e faasusulu atu le loto mama i taimi ma aso uma o le soifua ma le ola, ona le taufesiligia lea o le liligi faavai mai e le Atua o ona manuia, mo i tatou ma a tatou fanau.

Ina ia teu fatu uma pea i totonu oo tatou tagata, o le loto maualalo ma le loto mama, o auupega ia tatou te manumalo ai i le fili.

Aokuso 19 – 25, 2018.**Tusi Faitau: I Samuelu 16: 1 – 7.****Manatu Autu: E finagalo le Atua i lou loto faafetai.****Faafetai:**

Ona o le ola ma le malosi ma le tele o meaalofo a le Atua, o loo foai mai pea mo i tatou i aso uma.

Ona e ui ina tatou faagalo ma fulitua i le Atua i le tele o taimi, ae galue mai pea e faailoa mai mo i tatou ala o le manuia.

Ona o mea lelei e tele ma mea sili ua faia e le Atua, mo lo tatou manuia ma a tatou fanau.

Faatoesega:

Ona o le tele o taimi e galo ai ia te i tatou, ona faafoi le faafetai ma le viiga i le Atua, ona ua faapogisaina e tu'inanauga o le agasala ma le amioleaga, o tatou mata faaleagaga.

Ona ua tatou mumusu e ave le viiga ma le faafetai i le Atua, ona o le faamaualuga ma le manatu faapito oo tatou loto ia te i tatou lava.

Ona ua manino lelei i le tatou vaai le itu faaletino o lo tatou valaauina, a ua tatou le iloa ma pogisa le itu faaleagaga.

Manaoga:

Ina ia fesoasoani mai le Atua io tatou tagata, ia tatou iloa ona toe faafoi le faafetai le viiga ma le faamanu ia te Ia, i aso uma o lo tatou ola.

Ina ia le na'o le faafetai i le upu ma le tala, a ia atagia foi ma susulu atu i le faatinoga oo tatou tofi ma tiute, ma mea uma tatou te faia.

Ina ia aua lava nei faavaivai o tatou tagata, e vivii ma faafetai i le Atua i aso uma o lo tatou ola, ona o Iesu Keriso le atoaga ma le taunuuga o lona alofa tunoa, mo le fanau uma a tagata.

Aokuso 26 – Setema 1, 2108.**Tusi Faitau: II Koronito 9: 5 – 15.****Manatu Autu: O le Atua foai.****Faafetai:**

Ona o le tamaoaiga ma meaalofa e tele, o loo foai ma faasoa mai pea e le Atua, e faatino ai a tatou feau ma galuega i lea aso ma lea aso.

Ona o le pule faasoa a le Atua e auala eseese mai, aua se manuia o aiga o nuu ma ekalesia.

Ona o manuia o le eleele, le gataifale, o le susulu mai o le la ma le ea o loo tatou manavaina, ua tatou maua ai pea le ola fou e le aunoa.

Faatoesega:

Ona ua tele ina tatou manatu o lo tatou lava poto ma le malosi faaletagata, ua tatou maua ai meaalofa a le Atua.

Ona ua tatou limamau ma mataū e faasoa atu meaalofa a le Atua ua tatou maua, mo le manuia o isi uso a tagata ma le viiga o le Atua.

Ona ua tatou faaoga faaletatau meaalofa a le Atua, e saili ai le oa ma le tamaoaiga, ma mamalu ma viiga faaletagata.

Manaoga:

Ina ia tatou maua uma le alofa o le Atua e faaoga ai ana meaalofa, ua foai ma faasoa mai io tou aao ma o matou lima.

Ina ia manino pea i le tatou vaai faaleagaga i aso uma, o lo tatou faia o galuega ma mea lelei uma, mo le manuia o isi ma le viiga o le Atua, o le foai sili lena tatou te faia, aua e faatumauina ai faamanuiaga io tatou luga, e oo lava i le faavavau.

Ina ia faia uma a tatou foai mo le Atua ma lana galuega, i le faamaoni ma le atoatoa o le alofa, e pei ona Ia mua'i faataitai mai mo i tatou, e ala i lona Alo pele o Iesu Keriso, lo tatou Alii ma le Faaola.

Setema 2 – 8, 2018.

Tusi Faitau: **Kalatia 5: 13 – 15.**

Manatu Autu: **Alofa atu i le lua te tuaoi.**

Faafetai:

Ona o lana ekalesia ua fai ma molimau o lona alofa, o le talalelei lea ua faatalaleleiina ai lana fanau i le lalolagi atoa.

Ona o le faaali manino mai o le alofa o le Atua, tatou te alolofa atu ai i isi uso a tagata, aemaise lava i latou o loo ola i le pogisa o le agasala.

Ona o le alofa o le Atua ua faasaolotoina mai ai i tatou, mai mala ma puapuaga o le ola pologa ma le toilalopopo, i le pule sau a le alii o le lalolagi.

Faatoesega:

Ona ua leai se alofa e faatino ai o tatou tofi ma tiute, e pei ona valaauina ai i tatou e le Atua.

Ona ua faamuamua le faamalieina oo tatou manaoga ma tu'inanauga faaletagata, ua leai ai se alofa faale-Atua tatou te faaali atu io tatou tuaoi.

Ona ua tatou le faamaoni e foai ma le alofa mo le Alii ma lona finagalo paia, ina ia tupu lausiusi ma lauolaola lana ekalesia, i tulimanu uma o le atunuu ma le lalolagi.

Manaoga:

Ina ia faamaoni pea le alofa e susulu atu io tatou tagata, i le faatinoga oa tatou feau ma galuega i aso uma.

Ina ia faatino i le alofa moni foai uma tatou te faia mo le ekalesia, ma tumau ai pea le avea oi tatou ma itutino malolosi o le aiga o le Atua.

Ina ia aua lava nei galo ia te i tatou uma, o le faasusulu atu o le alofa moni faa Keriso i le tatou amio ma mea uma tatou te faia, o lo tatou manumalo foi lea ma le faaeaina i manuia o le Atua, e oo lava i le faavavau.

Setema 9 – 15, 2018.

Tusi Faitau: I Koronito 1: 26 – 31.

Manatu Autu: Ua na’o Iesu Keriso lo tatou malosi sili.

Faafetai:

Ona e leai lava se isi mea tatou te faamoemoe tatou te maua ai le ola, na’o le malosi o le Atua ma lona mana silisiliese, na toe faatuina mai ai lo tatou Alii Faaola, i le malosi o le oti ma le tuugamau.

Ona o le malosi o le Atua o loo tatou malolosi ai, e faatino ma faataunuu a tatou feau ma galuega, i totonu oo tatou aiga o nuu ma ekalesia.

Ona e laveai’ina i tatou uma e le malosi o le Atua, i taimi tatou te le mautonu ai ma tatou lagonaina le vaivai.

Faatoesega:

Ona ua tatou faaoga sese le malosi mai le Atua, i tu’inanau o le lalolagi ma mea faatauva.

Ona o lo tatou fia malolosi ona o le faavi’ivi’i mai o tagata, i mea ua mafai ona tatou faia.

Ona ua tatou manatu e mafai lava e lo tatou poto ma le malosi faaletagata, ona tatou manumalo ai i faaososoga a le tiapolo.

Manaoga:

Ina ia faaoga tatau lo tatou malosi mo Iesu Keriso, i tofi ma tiute tauave o loo tatou galulue ai i totonu o aiga, totonu o nuu, faapea foi ma le ekalesia.

Ina ia faatumauiina pea lo tatou fiafia, tatou te saili malosi i le Atua, i aso uma o lo tatou ola.

Ina ia fai i tatou uma ma faata’ita’iga sili, o le ola talitonu ma le ola faatuatua faamaoni i le Atua, e ala i le faatinoga oo tatou olaga i aso uma.

Setema 16 – 22, 2018.**Tusi Faitau: Filipi 4: 8 – 13.****Manatu Autu: Ia tatou fai mea lelei.****Faafetai:**

Ona ua filemu ma manuia o tatou olaga i lenei soifuaga le tumau, ona o le fai mea lelei ma le atoatoa o le Atua, ma le faamaoni o lona alofa tausii mai.

Ona o le galuega a le Agaga Paia lo tatou fesoasoani sili, o loo musumusuina pea i tatou i taimi uma, ina ia tatou faia na’o mea lelei ae lafoa’i mea leaga.

Ona o galuega ma mea lelei uma tatou te faia, e le gata e tupu lauusi ai le ekalesia a le Atua i le lalolagi, ae viia ai foi lona suafa paia.

Faatoesega:

Ona ua tatou le fiafia e fai mea lelei e atinae ae ai le galuega a le Atua, o Le e ana le malosii tatou te mafaia ai mea uma.

Ona ua tatou faamoemoe ma faalagolago i isi o tatou uso a tagata, latou te faia galuega ma mea lelei uma, a ia viia ma tauleleia ai i tatou.

Ona ua tatou manatu mama ma faatalale i lo tatou valaauina, ua tatou mumusu ai e faatino ni galuega mani mea lelei io tatou olaga.

Manaoga:

Ina ia tatou finafinau ma filiga, e faatino galuega ma mea lelei mo le viiga o le Atua, e ui ina tatou vaivai ma le atoatoa.

Ina ia faaosofia le Agaga Paia le ekalesia aoao ma tagata uma, e faia mea lelei ma mea sili, aua le tautuaina o le Atua ma lona finagalo paia.

Ina ia puna pea io tatou loto i aso uma lo tatou naunau, tatou te faia galuega ma mea lelei uma, aua tatou te maua ai le manuia ma le filemu, le fealofani ma le nofo lelei oo tatou tagata.

Setema 23 – 29, 2018.

Tusi Faitau: **Numera 6: 22 – 27.**

Manatu Autu: **E faamanuia mai le Atua.**

Faafetai:

Ona o le manuia mai le Atua ua tatou maua ai pea le ola ma le malosi, e faatino ai a tatou feau ma galuega.

Ona o meaalofa a le Atua ua avea pea ma faamanuiaga, mo i tatou ma o tatou aiga nuu ma ekalesia, faapea foi i le malo ma le atunuu.

Ona o le taulaga ua faia e Iesu Keriso i lona soifua, ua faamanuia mai ai le Atua i le fanau uma a tagata i le lalolagi, ma o le faailoga foi lea e iloa ai, e le tuulafoai'ina tatou e le Atua, i le malaia ma le faafanoga e faavavau.

Faatoesega:

Ona ua tatou faaaoga sese manuia o le Atua ua foai mai, ua alu vale ai o tatou taimi ma le malosi i mea e leai se aoga.

Ona o lo tatou manatu faapito na o i tatou lava, ua le mafai ai ona tatou faasoa atu manuia o le Atua, mo tagata uma e moomia.

Ona ua tatou sapi i faamanuiaga ma tamaoaiga e tele o le Atua, ae ua tatou maua ula futifuti.

Manaoga:

Ina ia saga foai mai pea e le Atua ona manuia i o tatou luga uma, tatou te faatino ai galuega ua tofia i ai i tatou, i le faamaoni ma le amiotonu.

Ina ia tatou lagonaina uma le loto maulalo ma le agaga faafetai i le Atua, ona o le lasi pea o ana faamanuiaga, e liligi ma foai mai mo i tatou.

Ina ia faamanino atili mai pea e le Agaga Paia mo le ekalesia ma i tatou uma, o le faatinoina o le tatou tautua i le alofa faamaoni ma le amiotonu, o le faatumauina foi lena o le foai mai e le Atua o ona manuia mo i tatou.

Setema 30 – Oketopa 6, 2018.

Tusi Faitau: **Luka 22: 39 – 46.**

Manatu Autu: **O le Ola tatalo.**

Faafetai:

Ona o le finagalo o le Atua ia fai i tatou ma auauna ma molimau o le talalelei, ma tatou to’oaga e tatalo tatou te mataala ai, i taimi o faaososoga.

Ona o le ala ua faasino mai e le Atua tatou te fesootai atu ai, ona tatou maua uma ai lea o le loto tele ma le malosi, e pei ona faia e Iesu Keriso lo tatou Faaola.

Ona o le tatalo tatou te faia ma le faatuatua faamaoni, e tali faaaliali mai lava le Atua ma foai mai, mea uma tatou te ole atu ai.

Faatoesega:

Ona o le le faamaoni o lo tatou ola molimau mo le Atua, tatou te augatata ai e tatalo i taimi ma aso uma o lo tatou ola.

Ona seiloga lava o taimi o lo tatou mafatia ma fetaia’i ma puapuaga, ona faatoa saputu lea o tatou tatalo i luma o le Atua, ae tatou te eva lava i le laufau malu, pe a sologa lelei mea uma.

Ona ua tatou naunau i le moe ma le faapaie ma le fiugofie, ua fai ia mea ma alofaga ona o le papa’ū o lo tatou faatuatua, ma ua le faataunuuina ai o tatou tiute e tatau ona fai.

Manaoga:

Ina ia foai mai le loto matala tatou te faia ai mea sili ma le lelei, i tiute ma tofiga ua valaauina i ai tatou.

Ina ia fesoasoani mai le Agaga o le Atua ia te i tatou, i taimi tatou te lagona ai le vaivai ma le musuā, ina ia tumau lo tatou faia o le faamaoni
ma le amiotonu, i le faatinoga oa tatou feau ma galuega.

Ina ia faatuputeleina lo tatou fiafia e mafuta i le Atua i aso uma i le tatalo, aua e le gata e faatumauina ai lo tatou ola mataala, ae manino ai foi le tatou vaai i soo se auala, e osofa’i mai ai i tatou e le fili.

Oketopa 7 – 13, 2018.

Tusi Faitau: **Salamo 127.**

Manatu Autu: **E faamanuia le Atua i Fanau.**

Faafetai:

Ona o le meaalofa paia a le Atua, ua avea pea ma faamanuiaga mo matua ma aiga, o nuu ma ekalesia, faapea foi malo ma atunuu.

Ona o le alofa o le Atua i tamaiti ma le manuia latou te maua io latou olaga, pe a usiusitai, ma mulimuli atu ma le faamaoni, i lana taitaiga alofa.

Ona o le faamaite a le Agaga o le Atua i galuega eseese, o loo faia e le ekalesia e faafaileleina ai, le soifua tuputupu a'e o fanau.

Faatoesega:

Ona ua tele ina le usitai ma le faalogo fanau i matua, ona o le televave o suiga fou ua i ai nei aso.

Ona o amioga le taupulea ua mafuli i ai le toatele o fanau, ma ua le fia mafuta ai i le Atua ma matua.

Ona ua toatele tamafanau a Samoa, e le gata i totonu o le atunuu ao atunuu e mamao, ua le fialia i lotu ma tapuaiga i le Atua, ona ua vaivai le faasino a matua i le ala tonu, latou te manuia ai.

Manaoga:

Ina ia iloa e fanau lo latou taua, ia iloa ona ava i matua, ae silisili ai ona latou iloa ona ola mata'u i le Atua, latou te manuia uma ai.

Ina ia faasoa mai pea e le Atua le atamai i le malo ma le ekalesia, e saunia ai polokalame aoga e tapena ai fanau mo le lumanai.

Ina ia manuia le afaigaluega ma faiaoga aso sa, faapea foi ma le fanau i lo latou aso Sa faapitoa i lenei tausaga, ma ia uluulumatafolau le feau faale-agaga, i lotu ma agaga o tagata uma.

Oketopa 14 – 20, 2018.

Tusi Faitau: **Tito 3: 1 – 8.**

Manatu Autu: **Ia faailoa atu le Talalelei.**

Faafetai:

Ona o Iesu ma galuega lelei o le faaolataga, ua avea ma faataitaiga mo lana ekalesia i le lalolagi. Ona o le faaaogaina o i tatou e le Atua e fai ma ave feau o lana talalelei, e faasusulu ma tala'i atu lana upu moni, e faa malalamaina ai tagata uma o loo ufitia pea i le pogisa. Ona ua avea le faailoa mai o le talalelei, ma mea ua lafoa'i ai e o tatou tagata tu ma aga faapaupau, sa ifo ma tapua'i i ai o tatou tua'a.

Faatoesega:

Ona ua tauamionuina i tatou i le alofa o le Atua, a ua tatou leiloa ona tumau ai i lana amiotonu, ona o lo tatou le faamaoni i lo tatou valaauina. Ona ua faafoliga mea tatou te faia i luma o tagata o e o matamata mai, ona o le femoumoua'i o lo tatou ola talitonu ma lo tatou ola faatuatua i le Atua. Ona o lo tatou paie ma le faapalapala, ua tatou faataligatuli ai i le valaau mai o Iesu.

Manaoga:

Ina ia aoao ma faamanino mai pea e le Agaga o le Atua mo i tatou uma, ia tatou iloa ona tauave lona mamalu ma lona paie, i aso uma o lo tatou ola. Ina ia aua lava nei galo ia te i tatou, o mea uma lava tatou te faia, e oo lava i le tatou tautala ma le savali, o auala uma na mai le Atua, tatou te faailoa atu ai lana talalelei. Ina ia tumau lo tatou fiafia ma le naunau o ō tatou loto, e faailoa ma tala'i le talalelei i tagata uma, a ia tatou taulamua foi i le faatinoina ai o lo tatou ola.

Oketopa 21 – 27, 2018.**Tusi Faitau: Kalatia 6: 7 – 10.****Manatu Autu: Aua nei o tatou faatamala i le manuia.****Faafetai:**

Ona o le ata manino na faia ai e le Atua le tagata, ina ia tumau pea lo tatou fia mafuta ia te Ia, ma auauna ia te Ia ma le faamaoni.

Ona o le onosa'i ma le faapalepale o le Atua, e tuu avanoa mai ai pea ia te i tatou, ina ia tatou lagona le salamo ma lafoa'i o tatou ala leaga, ae foi atu ia te Ia ma le faamaoni.

Faatoesega:

Ona o o tatou manao tuinanau ma loto le faamalieina, e mafua ai ona tatou faia pea le agasala ma le amioleaga ma le iloa.

Ona ua fia ola tutoatasi le tagata e aunoa ma le Atua, o le mafuaaga foi lena o le manatu mama i lona finagalo paia, ae saili lava le manuia o le tagata ia ma lona aiga.

Ona ua tatou fealoalofa'i i le talalelei a Keriso, ma tatou lagona ai le faavaivai musuā ma le paie, ma atili mativa ai o tatou tagata i faamanuiaga a le Atua, e foai mai e tausi ai lo tatou ola.

Manaoga:

Ina ia tatou maua uma le loto e tasi e fesootai ma galulue soosoo tauau ai, e tausoa faatasi ai le feau ma le galuega.

Ina ia aumai e le Agaga o le Atua le malosi ia te i tatou, i taimi tatou te lagona ai le faavaivai ma le fiu gofie, aemaise lava pe a luluti tiga o lo tatou ola valaauina.

Ina ia aveesea ma o tatou tagata le ola faafoliga fia pule ma le fia malosi, a ia faaafio Iesu Keriso io tatou loto, nate pulea ma taitai ma puipui lo tatou ola.

Oketopa 28 – Novema 3, 2018.

Tusi Faitau: **Filipi 2: 1 – 5.**

Manatu Autu: **E taua le loto maulalo.**

Faafetai:

Ona ua faataitai manino mai e Iesu Keriso, o le tatou tautua auaunaga ma le molimau mo le talalelei, e ao lava ona faatino mea uma i le loto maulalo.

Ona o le faaali mai mo i tatou uma o faaiuga manuia na faia e Iesu, i le faatinoga o lona valaauina, e tapena ma taoso ai o tatou tagata, i lo tatou foi valaauina.

Ona o le loto maulalo e maua ai le filemu moni i le va nonofo ai o tagata o aiga, tagata o nuu ma ekalesia ma malo ma atunuu, ae maua ai foi ma le faaeaina o le tagata, i le malo o le Atua e faavavau.

Faatoesega:

Ona ua avea o tatou vaivaiga faaletagata e faavae ai a tatou faaiuga fai, ma ua le maua ai se manuia ma se filemu, i le faatinoga oo tatou tofi ma tiute.

Ona o lo tatou faataga auauna ma faafoliga i le faatinoga o lo tatou valaauina, e alai ona tatou fetaia'i pea ma mala ma puapuaga.

Ona ua leai se avanoa o le loto maulalo io tatou tagata, ina ua pulea ma taitaiina i tatou e le faamaualuga, loto ita ma le fia tau ma sui.

Manaoga:

Ina ia liliuina e le mana o le Atua o tatou loto faamaualuluga ma le fiasili, i loto mama ma loto maulalo e tautua ai lana galuega.

Ina ia fusia i tatou uma i le loto maulalo ma le agamalu, ona susulu atu lea i le tatou amio ma mea uma tatou te faia, le alofa faamaoni ma le amiotonu, e pei ona finagalo i ai lo tatou Alii.

Ina ia faatumauina le maua'a ma le malosi o lo tatou faatuatua, ona manino ai pea lea i le tatou vaai faaleagaga i taimi ma aso uma o lo tatou ola, na'o le faamuamua o le Atua i mea uma, tatou te manuia ai.

Novema 4 – 10, 2018.**Tusi Faitau: Faataoto 2: 1 – 9.****Manatu Autu: O le mata’u i le Alii, e maua ai le poto.****Faafetai:**

Ona o le taiala ua faasino mai e le Atua e aoao ai fanau, o le faailoga o lo tatou taua i lona finagalo paia, ma e mautinoa le manuia uma ai o olaga o fanau, pe a latou faalogo ma usitai i ai.

Ona o taleni ma agavaa, ua faatamaoigaina ai e le Atua olaga o fanau ma i tatou uma, ua fai lea ma ala o faamanuiaga, mo nai o tatou aiga nuu ma ekalesia, faapea foi i le malo male atunuu.

Ona o le galuega a le ekalesia o le faafaileleina lea, o le tuputupu a’e o fanau i le poto moni mai le Atua, ina ia latou tulai mai i le lumanai oni taitai lelei, faamaoni ma savavali i le amiotonu.

Faatoesega:

Ona o amioga le taupulea ua mafuli i ai fanau, ona ua latou le faalogo ma usiusitai i matua, a ua fai lava mea latou te loto i ai.

Ona ua le faia lo tatou tiute o le aoaoina lea oa tatou fanau i le finagalo paia o le Atua, a ua aoaoina i mea tatou te loto i ai, e faamalieina ai o tatou tuinanauga faaletagata.

Ona ua tatou iloa ma iloa foi e a tatou fanau, le mea e tataua ona tatou faia tatou te manuia ai, a ua le faia, ona ua pulea e Satani o tatou loto ma manatu.

Manaoga:

Ina ia maua e fanau le poto moni mai le Atua, e taitaiina ai lo latou lumanai, ona manino ai lea i le latou vaai, na’o le ava lava i matua ma mata’u i le Atua, latou te manuia ai.

Ina ia faamaoni i tatou o matua i le tatou tiute mai le Atua, ae le o le faamalieina oo tatou loto i fiafiaga o le olaga, aetuulafoa’i a tatou fanau.

Ina ia malutia pea lo tatou ola ma a tatou fanau i aao alofa o le Atua, mai le tele o faafitauli ma mafatiaga o le olaga, aemaise o le anoanoa’i o faaososoga a le alii o le lalolagi, e lamatia ai pea lo tatou ola.

Novema 11 – 17, 2018.**Tusi Faitau: Eperu 13: 7 – 16.****Manatu Autu: O Iesu Keriso O le taulaga atoatoa.****Faafetai:**

Ona o le faiva faaola o le Alii, ua sasaa faaoti mai i lo tatou lalolagi agasala, ona o le faamaoni o lona alofa, mo i tatou uma le fanau a tagata.

Ona o le finagalo alofa o le Atua ua Ia saili mai ai pea mo i tatou, e ui ina tatou fulitua ma solipala lona finagalo paia i le tele o taimi.

Ona o le atoatoa o le taulaga na saunia e Iesu Keriso, ua atoatoa ai foi lo tatou faaolaina, pe a moni lo tatou lagonaina o le salamo, ma faamaoni lo tatou faatuatua ia te Ia.

Faatoesega:

Ona ua tatou mumusu e tala'i atu le talalelei, ona ua tatou ave le faamuamua ia tatou tu ma aga masani faaletagata, ma le faamalieina oo tatou lava tuinanau.

Ona ua tatou faataua tala a tagata ma mea tatou te faalogo ai, ae faagalologo le musumusuga a le Agaga Paia, o le taiala i lo tatou manuia ma le faaeaina.

Ona ua atagia i lo tatou fiu gofie, ma le femoumoua'i o le tatou tautua ma le auaunaga mo le Atua, lo tatou le faatauaina o le taulaga atoatoa na saunia e Iesu, mo lo tatou ola.

Manaoga:

Ina ia aua lava nei muta le molimauina o le talalelei, e le Agaga o le Atua io tatou loto ma agaga, ina ia tatou maua pea le malosi, tatou te molimau atu ai ma le le fefe.

Ina ia tatou maua uma le faatuatua faamaoni ma le lototele, e ofoina atu ai mea uma ua i ai tatou e oo lava i lo tatou ola, e fai ma taulaga mo le Alii.

Ina ia manatua ma teu fatu pea e tagata Samoa uma, i le atunuu ma soo se vaipanoa o le lalolagi, O le Alii o le Talalelei, o le Faavae lea o le atunuu.

Novema 18 -24, 2018.

Tusi Faitau: Mareko 4: 24 -29.

Manatu Autu: O mea e luluina e toe seleseleina.

Faafetai:

Ona o meaalofo a le Atua ua faaeaina ai o tatou tagata, ma lona tatalaina mai pea o avanoa tatou te sailiili atu ai mo mea sili, aua so tatou manuia ma a tatou fanau.

Ona o fua lelei ua tatou maua mai i tatou galuega o le tausaga, ua avea ma manuia tatou te tagolima i ai, aua le galuega a le Alii.

Ona ua uma ona aaoaina i tatou e le Alii, i le mea e tatou ona tatou fuaina atu, ina ia fua mai ai lana amiotonu ma lona alofa tunoa.

Faatoesega:

Ona ua faafefeteina o tatou loto e le malosi ma le masausau o le atamai faanei ona po, ua tatou totoina ai le ola fai manatu ma le faafiapoto i o tatou olaga.

Ona oo tatou manatu faamaualuga ma le mitamitavale, ua leai ai se faautauta e faataunuu ai o tatou tofi ma tiute, ma ua leai ai foi ma se manuia e foai mai e le Atua.

Ona o lo tatou faapalapala ma le paie, ua na ona tatou tatalo i le Atua i aso uma mo manuia, ae tatou te augatata e galueaina le vao ma le gataifale, o loo tumu i lona tamaoaiga.

Manaoga:

Ina ia fua tele mai i o tatou olaga fua e matagofie ma lelei, ona maualuga ai lea o le viiga o le Atua i mea uma tatou te faia, ma to faa ua mai ai manuia mo i tatou ma mea uma tatou te faia.

Ina ia tatou sasaa uma atu meaalofo a le Atua ua io tou aao ma o matou lima, e faatino ma faataunuu ai lo tatou valaauina, ona tatou fiu lea ma a tatou fanau, o aiga nuu ma ekalesia, e faaaoga ma tufitaufao faamanuiaga a le Atua, ae le uma.

Ina ia aua lava nei galo ia te i tatou uma, o le mea lava e lulu e le tagata, o le mea foi lena nate toe seleseleina.

Novema 25 – Tesma 1, 2018.**Tusi Faitau: Mataio 6: 33****Manatu Autu: Saili le Atua ma le Loto faamaoni.****Faafetai:**

Ona o le tautua matavela a o tatou tagata ma aulotu taitasi mo le galuega a le Atua, ua manuia ai galuega a le ekalesia, i le folauga umi o lenei tausaga ua faaiuiu.

Ona o le faamaoni o le alofa o le Atua, na Ia le tuulafoa'iina ai le Ekalesia ma o tatou tagata, i le tele o taimi sa tatou faafesagai ai, ma to'atuga ogaoga o le olaga.

Ona ua avea le soifua le pona o Iesu Keriso, e fai ma faaolataga mo o tatou tagata agasala, ma tatou maua uma ai le avanoa i le ola e faavavau, pe afai tatou te filifili e faatino mea uma i le loto faamaoni.

Faatoesega:

Ona o le manatu faapito i o tatou loto, ua le mafai ai ona tatou faasoa ma tufa atu manuia o le Atua, i isi o tatou uso a tagata o loo fia maua se fesoasoani.

Ona tatou faatoa saili lava i le Atua ma le loto faamaoni, i taimi tatou te fesaga'i ai ma mafatiaga ma puapuaga, ae tau a ina faataunuu i taimi e taugalemu ai le olaga.

Ona o le faapito o le tatou vaai ia te i tatou lava, e tele ai ina tatou tuuaia le leaga i isi tagata, ma le maua ai so tatou filemu ma le fealofani.

Manaoga:

Ina ia tumau mai pea le alofa o le Atua mo i tatou, mana silafia mea uma tatou te mafatia ai, ma fesoasoani mai pea i lo tatou vaivai.

Ina ia soifua tumau Keriso io tatou loto uma, ma tatou maua ai pea le malosi tatou te molimau ai ma le loto faamaoni, e faasusulu atu le alofa ma le agalelei o le Atua i tagata uma.

Ina ia fusia i tatou uma i le loto faamaoni, tatou te tutu ma galulue faatasi ai, ona le taufesiligia lea o le faamanuia mai o le Atua, i mea uma tatou te faia.

Tesema 2 – 8,2018

Tusi Faitau: **Mareko 9: 33 – 35.**

Manatu Autu: **Tautuaina o le Galuega a le Atua, e fai faaleagaga.**

Faafetai:

Ona ua avea le liutino tagata o le Atua, e ala ia Iesu Keriso lona Alo pele ma lo tatou Alii Faaola, ua tatou iloa ai le uiga o le ola auauna.

Ona afai tatou te faalogo ma usiusitai i le Atua ma lona finagalo paia, ona mamao ese lea o lona toasa ma i tatou.

Ona o aoaoga manino a Iesu mo tagata uma, a fia muamua se tasi, ia avea ma le mulimuli i tagata.

Faatoesga:

Ona o le naunau ma le losilosu o tatou loto, i mea e leai se aoga o lenei olaga le tumau, ua taumamao ai ma lo tatou ola faamanuiaga a le Atua.

Ona ua faatino le tatou tautua ma le fiasili ma le faamaualuga i isi o tatou uso a tagata, ua avea ai ma mea mataga ma le inosia, i le silafaga ma le faafofogaaga a le Atua, le tatou auaunaga.

Ona o lo tatou fiafia pea e toe feau a tatou galuega lelei ua faia mo le Alii, e manumalo ai pea le tiapolo I lo tatou ola.

Manaoga:

Ina ia tatou maua uma le agaga o le galulue faatasi ma le Atua, ona mautinoa lea o le faatonutonu mai oi tatou e le Agaga Paia, ma faailoa mai faaiuga ma filifiliga uma tatou te faia, tatou te manuia ai.

Ina ia aua nei mapu le galuega faamalosiua a le Agaga o le Atua io tatou loto, tatou te maua uma ai le poto e fetuuna'i ai ma fetala'i o tatou manatu, i mea aupito sili ona lelei tatou te faia, tatou te manuia ai.

Ina ia faapupula ma faamanino mai pea i aso uma Afioga paia a le Atua, ma ia tupu lauolaola i totonu ia te i tatou, ma a tatou fanau.

Tesema 9 – 15, 2018.

Tusi Faitau: **Isaia 11: 1 – 5.**

Manatu Autu: **O le Mesia na valoia.**

Faafetai:

Ona o le tama na valoia, ma folafola mai e perofeta lona fanau mai, o Ia lava o le Mesia ma le Faaola o le lalolagi.

Ona o le alofa le faatuaoia o lo tatou Alii, ua faamagaloina ai uma a tatou agasala, ma toe maua ai e le tagata toilalo i le fili le avanoa, e toe mafuta atu ai i le Atua.

Ona ua avea Iesu Keriso, le atoaga ma le taunuuga o le alofa tunoa o le Atua, e fai ma faamoemoe fou, mo soo se tagata e faatuatua.

Faatoesega:

Ona e tiga ona tatou iloa le agasala ae tatou faia lava, ona ua faasili ia te i tatou le faamalieina, oo tatou lava tuinanauga faaletagata.

Ona o le tele o taimi, tatou te popole atuatuvaile ma le mautonu, ina ua faapogisa e le tiapolo o tatou mata, ua tatou leiloa ai o loo tatou faimalaga faatasi ma le Alii.

Ona ua avea lo tatou manatu mama ma le faatalale io tatou tofi ma tiute, ua le mamafa ai ia te i tatou Afioga paia a le Alii, o loo fai mai taiala i lo tatou ola.

Manaoga:

Ina ia avea lo tatou faamanatuina o le Afio mai o le Alii Faaola i lenei tausaga, e saga faamausaliina ai ma faatumau lo tatou ola talitonu, ma faatuatua Ia.

Ina ia tumau le faatumuina pea oo tatou loto uma i aoaoga a le Atua, ma faatino ai lo tatou valaauina, ona tumau foi lea o le manuia ma le filemu, io tatou luga e le aunoa.

Ina ia tatou maua uma le fetausia'i fealofani, ma le loto faamagalo e faafoe ai o tatou olaga, ona manino ai lea i le tatou vaai, faaiuga ma mea lelei uma e ao ona tatou faia, mo le manuia o tagata uma ma le viiga o le Atua.

Tesema 16 – 22, 2018.

Tusi Faitau: **Kalatia 2: 20 – 21.**

Manatu Autu: **Ia tumau ia Iesu Keriso.**

Faafetai:

Ona o le avanoa ua maua e faaaogaina ai le ekalesia ma o tatou tagata, mo Iesu Keriso ma le talalelei o le faaolataga.

Ona o lo tatou valaauina e fai ma meafaigaluega a le Alii, e folafola atu lona afio mai, e faamalamalamaina ai tagata uma o loo ufitia pea e le pogisa.

Ona o le faaoloaina oo tatou mafaufau vaivai I le poto mai le Alii, e faatonutonu ai mea uma tatou te faia, mo le manuia o fanau, o aiga nuu ma ekalesia.

Faatoesega:

Ona o le papau o lo tatou ola faatuatua, ua tatou leiloa ai tauave o tatou tiute ma matafaioi, o le faailoa atu lea o le Atua ma lona alofa, i aso uma o lo tatou ola.

Ona ua avea lo tatou faapalapala fiugofie ma le faavaivai, ma mea ua faapalapala ai foi ma faavaivai isi o tatou uso a tagata, ma le galuega a le Atua.

Ona o le faasamasamanoa ma le lē pulea lelei o ō tatou mafaufau, ua tosina ai o tatou loto i fiafiaga ma tuinanauga o le lalolagi.

Manaoga:

Ina ia soifua Keriso io tatou loto, ma faatumulia i tatou uma i le agaga fia vivii ia te Ia i aso uma, ona tatou le sese ese lea ma le moa o le ala.

Ina ia faaoloaina i tatou uma e le Atua i le lototele ma le atamai, e mautinoa ai lo tatou manumalo, pe a tatou fetaia'i ma faafitauli ma puapuaga, o lo tatou valaauina.

Ina ia aoao mai pea e le Atua mo i tatou uma, auala eseese o ana faamanuiaga faaleagaga, e faatino ai le tatou tautua ma le auaunaga, ona avea ai lea oi tatou, e faafouina ai le ola o isi tagata.

Tesema 23 – 29, 2018.

Tusi Faitau: **Mataio 2: 1- 6.**

Manatu Autu: **O Iesu Keriso o le meaalofa sili mo le lalolagi.**

Faafetai.

Ona o le meaalofa sili ua foai fua mai e le Atua mo le lalolagi, ua fai lea ma sulu o le ola fou io tatou olaga agasala.

Ona ua avea lenei vaitau o le Kerisimasi ma tala o lona alofa, e fai ma ala matagofie mo tagata uma, e faatuatua ma usiusitai ia te Ia.

Ona ua mavae atu foi le tele o feau ma galuega o lenei tausaga, ao le alofa o le Alii o loo faatumauina ai pea le malosi ma le fiafia, e mafuta ai ma fanau o aiga ma uo I le Kerisimasi.

Faatoesega:

Ona ua le mamafa ia te i tatou le atoatoa o le alofa tunoa o le Atua, na liutino tagata ai e ala ia Iesu Keriso, lona Alo pele ma lo tatou Alii Faaola.

Ona o le tele ma le anoanoa'i o ala eseese ma meaalofa ua tatou tapena, e faamanatuina ai lenei vaitau o le Kerisimasi, a ua leai ma se mea e tasi e atagia ai lo tatou iloa moni o le Alii, ma le faamaoni o lona alofa mo i tatou.

Ona ua faafoliga lo tatou olaina o le finagalo paia o le Atua i mea ua tatou faia, ina ua numia i tatou i le pouliuli, o le tuinanau ma le manao lasi.

Manaoga:

Ina ia avea le faamanatuina o le aso na soifua ai le alo o le Atua, e faafouina ai o tatou agaga, ma susulu atu ai i le faatinoga oo tatou olaga, le alofa moni faa-Keriso.

Ina ia fesoasoani mai le Agaga o le Atua, tatou te faia ai filifiliga ma faaiuga lelei, mo le manuia oo tatou aiga, o nuu ma ekalesia.

Ina ia tatou lagonaina uma le loto faamaulalo io tatou sese, aua e aumai ai le nofolelei ma le filemu i taimi o le vevesi, ma tatou maua ai le agaga o tofiga a Keriso, mo ana feau.

Tesema 30, 2018 Ianuari 5, 2019.

Tusi Faitau: II Koronito 5: 16 – 17.

Manatu Autu: O le tagata fou.

Faafetai:

Ona o le alofa le faatuaioia o le Atua, ua liliu ma faafouina ai lo tatou ola, a ua mafai ai foi ona faaaau mai a tatou feau ma galuega lelei, i lenei tausaga.

Ona o le gagana o le alofa, o loo faamatala ai lona silisiliese ma le matagofie, ia te i latou uma e tausisi atu i ana faataitaiga ma aoaoga.

Ona ua na’o le faamaoni o lo tatou ola faatuatua i le Atua, tatou te maua ai le tofa loloto ma le faautaga potu, aemaise o le malosia fou, e faatino ai lo tatou valaauina.

Faatoesega:

Ona ua tatou manatu ua lava taoso le tatou faigamalaga e aunoa ma le Atua, ina ua le tali mai o Ia i mea tatou te manana’o ai.

Ona ua tatou faamuamua o tatou tagata ae faamulimuli le Atua, ua tatou le maua ai le agaga o le alofa, e fesoasoani atu ai i e puapuagatia ma mafatia.

Ona ua le o gatasi a tatou upu ma a tatou amioga, ina ua mua ona tatou saili i manuia faaletino, i loo le sailia lea o manuia faaleagaga.

Manaoga:

Ina ia tumau le faamaoni ma le atoatoa o le alofa i le Atua io tatou loto, e faatino ai le tatou auaunaga i ona luma, ona avea ai lea oi tatou ma tagata fou, ua tatou iloa tino atu ona manuia e faavavau.

Ina ia faafouina uma e le mana o le Atua o tatou tagata ma le ekalesia, tatou te galulue uma ai ma le alofa, faamaoni ma le amiotonu.

Ina ia alofa mai le Atua, ma faamanuia le tatou folauga ma le faigamalaga, i le amataga o lenei tausaga fou.

**Ia taitai pea e le Leoleo Mamoe Sili, le soifua tatalo o le Ekalesia i
lenei tausaga, e mautinoa le manuia ai.**

Amene.